



Inatsisartut Suleriaasianni § 36 malillugu apeqquteqaat aallaavigalugu oqallinnissamik imaattumik siunnersuuteqarpunga :

### **Apeqquteqaat aallavigalugu oqallisissaq, qanoq iliorluta aatsitassat nunatsinnut nunaqavissunullu iluaqutaanerulersinnaavagut?**

(Inatsisartunut ilaasortaq, Mariane Paviassen, Inuit Ataqatigii)

#### **Tunngavilersuut:**

Aatsitassat pillugit inatsisartut inatsisaat januaarip aallaqqaataani 2010-mi atuutilermat eqqarsartorpassuuvugut kiisami nunarput aalisagaannaangitsunik annertuumik isaatitsiffeqalernissaanik peqalerpoq. Isumalluarnerujussuup oqarluartaartoqartarnerujussuullu manna tikillugu kinguneqannginnera peqqusileqinartutut oqaatigineqartariaqarpoq, mannami tikillugu suli allamik innuttaasut amerlanerpaartaat pissarsiaturaaat neriulussinnarneq aamma neriulussinnarneq.

Nalunami guultimik nassaartoqarmat nuannateqaagut, isumalluaqaagut Nanortalimmiut pilissuannngortussanngortut allaat eqqartorneqarpoq, Rubin-isiorfik aamma annertuumik isumalluutaagaluarpoq tupinnaannartumilli maannamut nunatsinnut aatsitassarsiorluni ingerlatsiviusut iluanaarutaanerat malugineqanngilaq, isumallualussinnartuarpugut naak aatsitassarsiorfiit aatsitassanik nalituunnik piaallutik ingerlagaluarlutik amigartooruteqartuarlutik, ilaatigut akiliisinnaajunnaariarlutik allatut taaguuteqalerlutik aatsitassarsiortunik ingerlasoqaqqilersaraaq, allaanngilaq oqaluttuaq taanna naassaanngitsoq kaaviaartoq.

Kujataani nunaminertat annertuut aatsitassarsorfissatut misissueqqissaarfingineqarnissaat misissueqqaarnianut tunniussuunneqareersimalerput, nunaminertat pisuussutitsinnik peqarfiusut annertoorujussuit nunami allamiunut tunniussuunneqarnikuusutut

# INUIT ATAQATIGIIT

## Inatsisartuni



oqaatigineqarsinnaalernikuupput allaammi uagut nunaqavissut  
aatsitassarsiorniat nunami allami najugaqartunut qinnuteqaqqaartariaqarluta  
ujaqqanik tigusisinnaalernikuuvugut nunatsinni nunaminertanut  
oqaasissaarunniukuuvugut, tamanna akueriinnassavarput?

Uanga isumaqarpunga naamik taammaatariaqanngilaq inatsisilu  
allangortinneqartinnagu soriarsinnaanngitsutut isumalluaannartussatut,  
oqaluttuallu akiliisinnaajunnaartarneq nunatta iluani nunaminertanut  
oqaasissaarutarneq ingerlajuartussatut isikkoqarput. Nunasiaateqarfittut  
allaanerusutut oqaatigineqarsinnaavugut nunattami ilaanni  
oqaasissaarussimavugut.

Nunaminertat kujataani nunani allamiunut pigineqalernikut uterteqqinnissaat  
maannakkut inatsit atuuttut naapertorlugut ajornakusoortorujussuovoq,  
taammaammat Inatsisartut maani oqallisigisariaqarparput aatsitassanut inatsit  
qanoruna ittoq maannakkorniit nunaqavissunut malunniuteqartumik  
iluanaarutaasumik ingerlatsiffiusinnaasumik pilersitsisariaqartugut ?  
Qlarinngisara unaavoq allannguisariaqarpugut.

Nammineq isumaqarpunga nunatta pisuussutai uummaatsuuppata  
uummassusiliuppataluunniit maani nunaqartuusugut tamatta iluanarutaanerat  
malugisariaqaripput, pinnersaasiat nunarsuarmi akisunerpaajusut  
annissorneqarput uagulli nunaqavissut annertunerusumik maluginngilarput.  
Aningaasaqarnermut inatsisisami aatsitassanut royaltiesinik taaneqartartumut  
isertitassatut naatsorsuutigineqartut 0,-koruuniupput aali aatsitassarsiornermik  
ingerlatsisoqaraluartoq.

Nunaminertamik aatsitassarsiornianut tunniussisoqassatillugu  
ajornannginnerusumik nunatsinnut uterteqqinnissaanguneqartariaqarpoq,  
ilumoortuusinnaanngilarmi nuna annertoorujussuaq oqartussaaffigiunnaarlugu  
nunaqavissullu periarfissaarullugit tunniussuinnartoqartarnissaa.  
Aatsitassarsiornlutik ingerlatsisut amigartoorteqartuartut saniatigut suli

# INUIT ATAQATIGIIT

## Inatsisartuni



nunaminertanik annerusunik tunioraannassavagut? Aatsitassarsiortunut sunik piumasqaateqarusuppugut? Uannut taanna nalunanngilaq

Nunaminertanik tunniussuiinnarneq allanngortittariaqarpoq, ajornannginnerusumik aatsitassarsiorfik amigartoorteqarpat nunaminertamik utertitsisinnaaneq piaartumik ingerlaneqarsinnaasariaqarpoq, misissueqqaarnermilu piffissami aaliangersimasumi misissuinerit ingerlaneqartartussanngortariaqarput, imaanngitsoq ukiuni qulikkaat sinnerlugin misissueqqaarnissamik nunaminertamik peqartoqartassasoq akueriinnassagipput, illua'tungaanni nunaqavissut pinnersaasiornermik ingerlatserusukkaluit aporfilersorlugit. Nunaminertanik tunniussanik ukiuni aalajangersimasuni misissueqqaarnermik killiliisariaqarnerput qanoq isumaqarfingineqarpa? Qinnuteqaqqaarternerit ingerlajuartissavagut?

Inoqarfiit eqqannguanni aatsitassarsiornermik  
ingerlatsisoqarsinnaatittuassavarput?

Aatsitassarsiortunut ajornanngippallaamik ingerlasoqarsorivara qanorluunniit ukiut amerlatigut amigartoorteqartuarluni ingerlaannarneq illua'tungaani pisuussutigut annissortuarlugit, ilisimasariaqarparput nunatsinniit aatsitassat pinnersaasiaappata atortussiaappataluunniit qanoq annertutigusoq nunatsinniit annissorneqarnersoq, annissorneqartut aningaasanngorlugit qanoq naleqarnersut iluanaarutaanillu pissarsiaqartariaqarpugut.

Aatsitassanut inatsit nunatsinnut qanoq iluaqutaanerusoq  
pissarsiaqaataannerusorlu pilersissagutsigu qanoruna iliortariaqartugut?  
Maannakkutummi ingerlaannarsinnaanngilagut.

Oqallinnerup ingerlanera tusassallugu qilanaaraara. Qujanaq.